

HEBRIFO Ovoli Kĩ Betselε Bεma Hebrifo

Baguma Tsā Obi Akū Ele Kodzela.

^I Ne kókoe a, Baguma lemó boe bawanyo a kodzela loko pii ne tisi aholo aholo akū, etsāmena ye onukpě banyene akū. ^{II} Leme ne fuwi nkaε kīĩ kame ni, Baguma lemó boe kodzela etsāmena ye Obi akū. Ade Obi kīĩ akū etsā ebóa katinya flee, epau ye kī enya letsa nye letsa olate a. ^{III} Obi a lenye ayekī Baguma kukūkpale la etsa, ade Baguma kutidu a pεpεpε ye malo edeĩ a. Obi a kóa Baguma kale a kobě epini katinya flee. Kĩ evole bati tokpa eyua a, enadzi ne Baguma Kpale ne ode flee a somona.

Baguma Obi a Nye Ode Foto Banyane a Onokóě.

^{IV} Baguma kena ye Obi a ebě Baguma ode foto banyane a, kitonekī dĩ a kī Baguma te ye a te koya leba be bade a.

^V Kitonekī Baguma tábi ye foto banyane a kame odima tō kī,
“Nó nye yī Obinyole.

Nviā luwi kīĩ mma nó.”
Bio Baguma tále ne ye ode foto banyane a kame odima akū kī,

“Maanya ye Olεga,
ade ye malo enya yī Obi a.”

^{VI} Ade loko a kī Baguma we kī yado ye obinyole otonyade ne katinya kame a ni, ele kī,
“Ode foto banyane a flee, misum ye.”

VII Leme ne ode foto banyane a akũ ni, Baguma le kĩ,

“Baguma kena ye ode foto banyane nde owe,
ade ekena ye ode basumune nde fi fome a.”

VIII Leme ne ye Obi akũ ni, Baguma le kĩ,

“O Baguma, no legākanya aawa daa daa.
No bati akũ kanya tsẽ osi kpĩ akũ.

IX Awe tuwĩ kakena leme akesĩ tokpa a.

Ade foesũ Baguma, no Baguma a pau no a,
ekpa no obũ kadzikõ kĩ kawole deĩ kebẽ no
bakoba flee kade a.”

X Baguma buki ele kĩ,

“Boe olate, no leboa tite ne kayokayi a,
ade okoa no moa awe okena ode leme a.

XI Fotsa kĩĩ flee aawo, leme no kõ aana daa,
foe flee foadẽ fotse nde tetadiẽ.

XII Aabuta foe nde atadiẽ,
ade foadani nde tetadiẽ.

Leme no kõ ade ayea aana daa a,
ade no nkpã kadzi lelá kawũna a.”

XIII Baguma tábi ye ode foto banyane a kame odima tũ kĩ,

“Dzi ne yĩ somona ne awĩ,
kenaawo kĩ nkoo no bakesĩne nkena no aboa
katekõ.”

XIV Kekõ baáde nye ode foto banyane a? Ade be nye hũhũ a kĩ basum Baguma, ade yado be leme kĩ benaabumena bati a kĩ baana nkpã kate a.

II

Baguma Kpa Boe Nkpã Kate Kpale.

^I Ade foesũ kene kĩ boapi onokooali foletsa a kĩ bunu a budomoo akũ mo osĩ mo osĩ, ayekĩ boláayela osi. ^{II} Betsa kĩ nte Baguma oledo a kĩ ye

ode foto banyane kwa bema boe bawanyo a nye onokoali, mo odi nye odi ki efum iye etakena ne ye aku a te foe soto kavele ki sefeta a ni, ^{III} nde boapuli bulo soto kavele a ki baakpa boe a, nte botate nkpā kate kpale ki a? Boe Olate moawe lenya loto ele nkpā kate foletsa ki, ade bikī binu foe a di adansie ki fonye onokoali a. ^{IV} Ne loko moape a kame a, Baguma moawe kwa nsentseleni mo awāwā fotsa futefute kakena edi adansie ne nkpā kate a aku, ade esē Hūhū Kpalewa futetsa a ekpa bati ne ye kawe onukpē a.

Yesu Kpā Boe Yanamena Nkpā Kate Kame.

^V Baguma takwa katinya a ki kaaya, ki ke aku foletsa bolamena kale a aku kanya edo ne ode foto banyane a awe. ^{VI} Mbom bele ne Katsela Kpalewa a kaka kadi kame ki,

“Litsa nye otidziwa obi ki akona ye aku?”

Litsa kou nye otidziwa ki api ye kadunamo aku?

^{VII} Okena ye ne kayo loko lukū lidi oba ode foto banyane a.

Leme okwa kukūkpale mo obu ota ye nde legāboe aye.

^{VIII} Ade okena ye ki enya fotsa flee aku a.”

Katsela Kpalewa a le ki okena ye ki enya fotsa flee aku, foesū letsama tabuki lite ki elá kobē ne de aku. Leme finyaa boamo ki otidziwa deī kobē ne fotsa flee aku. ^{IX} Leme bomó Yesu a ki bekena ne kayo ne loko lukū kame eba ode foto banyane a, ayekī fotsā Baguma konyakamo kame eyaaku ne odi nye odi lolo a, finyaa kō bomó ye ki Baguma

kɔa obu mɔ kukũkpale etsa ye nde legãbɔe aye, ne wuda lubo a kĩ emó a sũ.

X Fɔnɛnɛ kĩ Baguma kĩ ebɔa fotsa flee, epini foe a, ekɛna Yesu ekpɔla etsãmena lubo kamɔ kamɛ, ayekĩ yaakpã bati beblebee beyaana tsefã ne ye kukũkpale a kamɛ. Kitonekĩ oti a kĩ yakpã be kanamena nkpã kate kamɛ a nye Kristo.

XI Kitonekĩ oti a kĩ yakpale bati akũ a, mɔ bati a kĩ bekpale be akũ a flee deĩ ɔlega mɔape. Ade foesũ kɔnyɔã lákɔ Yesu kĩ yave be ye bawaẽ a.

XII Yabi Baguma kĩ,

“Maade nɔ dĩ akũ letsã nkpa awaẽ amɛ,

ade maasã tɔnɔ mmu nɔ ne be katsenakõ a.”

XIII Ebuki ele kĩ,

“Maakɔa anɛ nte ne Baguma akũ.”

Ade ebuki ele kĩ,

“Amɔ yĩ mɔ babi a kĩ Baguma kɔa ekpa yĩ a ne awĩ.”

XIV Ne ayekĩ babi a kĩ yawɛ a nye batidziwa, kĩ bideĩ sukɛna mɔ babɔanɛ sũ ni, Yesu malo dani ekɛna otidziwa, edzi nkpã nde be aye. Ekɛna fukĩ fotsã ye wuda kamɛ, ewɔla Abonsam a kĩ ye nɛɛ wuda kɔbẽ a. **XV** Ke liti lemɛ, Yesu kɛna fukĩ kĩ bati a kĩ wuda kavila ne be nkpã kadzi flee kamɛ fõ bedani basate a, befõ wuda kavila.

XVI Kitonekĩ ne ɔnɔkɔali kamɛ ni, nné ode foto banyanɛ a yakpa kabumena, mbom Abraham babi mɔ bawa yabumena. **XVII** Fukĩ atsa kĩ kɛnɛ kĩ bekɛna ye nde ye bawaẽ aye ne osi nye osi akũ, ayekĩ yaapuli enya be ɔsɔfɔnɔkɔẽ Flee kĩ yamɔ bati kɔnya. Yaakasum Baguma ne ɔnɔkɔali kamɛ lemɛ, ayekĩ yaafõ benye tokpa ne bati akũ.

XVIII Ne ayekĩ ye mɔawe emɔ lubo, etsã sohuiɛ

kame leme sũ ni, yaapuli ebumo bikĩ be malo bideĩ ne sohũie kame a leme.

III

Yesu Bẽ Mose.

^I Nwaẽ ame Kristofõ, kĩ Baguma ve etomena ode leme a, mikõna Yesu a kĩ Baguma do kĩ enya Ɔsofõnõkõẽ Flee ne katekado a kĩ bõnẽe a midã. ^{II} Edĩ ɔnõkõali ekpa Baguma a kĩ ye lepau ye kĩ ekena adzuma kũ, nde ayekĩ Mose leme di ɔnõkõali ekena adzuma ne Baguma tõtõ kame a. ^{III} Nde ayekĩ babu kõla okene kaba kõla mõawe a ni, ade aye kefeta kĩ Yesu ena obu baũ eba Mose a. ^{IV} Kõla nye kõla ni, oti ake koe. Leme ne ɔnõkõali kame ni, Baguma nye oti a kĩ eke fõtsa a flee. ^V Mose di ɔnõkõali nde ɔsumune aye ne Baguma tõtõ kame, ade edi adansiẽ ne fõletsã a kĩ Baguma aanye etsa ne kunya kame a akũ a. ^{VI} Leme Kristo kõ dã Baguma tõtõ akũ ne ɔnõkõali kame nde Obi aye. Boe nye ye kõla a, nte budo ɔwõle, bõna katekado ne letsã a kĩ boe ane teĩ ne de akũ a akũ.

Kaweyakõ Deĩ Kekpa Baguma Bade a.

^{VII} Ne foesũ nde ayekĩ Hũhũ Kpalẽwa a le a, “Nte minu Baguma odo ne nviã ni,
^{VIII} mitakena ato ɔsĩ,
 nde ayekĩ mi bawanyõ kena a,
 kĩ biyidza bedza ne Baguma akũ luwi a ne
 kõsa kame, besõ ye bedã a.
^{IX} Ade besõ yĩ bedã ne awã bewẽ fõletsã leme ne
 yĩ akũ,
 titõ kĩ bemó fõtsã a kĩ nkenã ne futeli tenã
 kame a malo.

X Ne foesũ nna kalokpa ne bati a akũ ade nle kĩ,
 ‘Bafum ade bayela osi a,
 ade bisĩ baákena ne yĩ mbla a akũ a.’

XI Nna kalokpa ade nlo fubo nle kĩ,
 ‘Beláake kɔbɔa ne tite a kĩ kufe maakpa be
 kaweya a akũ da!’ ”

XII Nwaẽ ame bate badone, midã kadã wĩ kĩ
 mi kame odima etana owɔle kpa mo katatekado
 lokɔa emuniki ne Baguma a kĩ edzi nkpã a liti.

XIII Mbom mikaabumena akũ akũ luwi nye luwi,
 kĩ nviã ne Baguma foletsa kame a tsela boe akũ,
 ayekĩ tokpa leláake mi, ñye mina ato osĩ. Tsela
 boe akũ.

XIV Kitonekĩ boe flee budeĩ tsefã mo Kristo nte
 bupini boe katekado mo osĩ kenawo kawũna
 a, nde ayekĩ buyi kayɔ a. XV Bele ne Katsela
 Kpalewa a kame kĩ,

“Nte minu Baguma odo nviã ni,
 mitakena ato osĩ
 nde ayekĩ mi bawanyɔ kena a,
 kĩ biyidza bedza ne Baguma akũ a.”

XVI Bawei linu Baguma odo mo biyidza bedza
 ne ye akũ a? Ade be nye bati flee a kĩ Mose kpã
 etomena Egipte tite akũ a.

XVII Bawei akũ mo Baguma na kalokpa futeli
 tena flee? Ade be nye bati a kĩ bekena tokpa
 kĩ biku bekahɔ ne kɔsa kame a. XVIII Bawei akũ
 Baguma lo fubo ele kĩ, “Beláake kɔbɔa ne tite a
 kĩ kufe maakpa be kaweya a akũ da”? Ade bati
 a kĩ biyidza bedza ne Baguma akũ a. XIX Foesũ
 bomó kĩ betápuli biwo tite akũ, kitonekĩ betáte
 Baguma bido.

IV

^I Foesũ kĩ Baguma buki ebinya osi eyi ne ye kaweya a kĩ eɛ eyi a kame kawo sũ ni, mifõ bodã kadã wĩ ayekĩ beláamɔ kĩ mi kame odi tápuli ena kaweya a kame kawo. ^{II} Kitonekĩ bibi boe Kale Wĩ a nde ayekĩ bibi be malo a. Binu foletsa a, leme betána foe akũ nfaso, kitonekĩ kĩ binu foe a, betáte foe bido. ^{III} Leme boe a kĩ bote budo a, buwo ne kaweya a kĩ Baguma le eyi a kame. Nde ayekĩ eɛ kĩ,

“Nna kalokpa ade nlo fubo kĩ,

‘Beláake koboa ne tite a
kĩ kufe maakpa be kaweya a akũ da!’ ”

Baguma le fukĩ tito kĩ eyua ye moawe adzuma kito loko a kĩ eboa katinya a malo. ^{IV} Kitonekĩ Baguma le ne Katsese Kpalewa a kako kadi ne luwi luvũkonode a akũ kĩ,

“Ne luwi luvũkonode akũ a,

Baguma dzi eweya,

ade etábuki ekena adzuma adima a.”

^V Ebuki eɛ kale moape a kĩ, “Beláake koboa ne tite a kĩ kufe maakpa be kaweya a akũ da!”

^{VI} Bikĩ benya loto binu Kale Wĩ a tápuli biwo ne kaweyakõ a, kitonekĩ betáte bido, leme osi buki ebinya kĩ badi biwo. ^{VII} Baguma yi luwi bebã kĩ bave Nviã, ne futeli pii liti. Ke liti a, Legã Dawid le kodzela etsãmena foletsa a kĩ bole kodzela ne foe akũ boyatẽ a kĩ,

“Nte minu Baguma odo nviã ni,

mitakena ato osĩ.”

^{VIII} Kitonekĩ nte Yosua ekpã be ewo ne kaweyakõ a kĩ Baguma le eyi a ni, kufe Baguma lelábuki eɛ kale ne kaweya luwi bebã akũ ke liti a.

^{IX} Foesũ kaweya luwi buki lideĩ lekpa Baguma

bade a, nde ayekĩ Baguma aweya ne luwi luvũkõnde akũ a ^X kitonekĩ odi nye odi kĩ ewo ne Baguma kaweyakõ a, aate kaweya ne be adzuma kame nde ayekĩ Baguma leme fõ ye mawe adzuma kakena, eweya a. ^{XI} Foesũ mifõ bõbõa mbõdi buwo ne kaweyakõ a kame, ayekĩ boe kame odima leláatomena be õbla kpa a, eto ne ato õsĩ sũ.

^{XII} Kitonekĩ Baguma kale a deĩ nkpã ade kelamena adzuma a. Kideĩ õbõ kebẽ atugbe adi nye adi, ade katsõe kanaawo awã kĩ kasẽ okla mõ hũhũ kayite. Kawo kanaasẽ fõtsakõ fõtsakõ mõ fõtsõ kame tõbõ kayite. Kale a adzemo oti adzuni mõ ye õwõle kame fõwetsa yededeede. ^{XIII} Letsama leláa kĩ baapuli bekõa bekõla Baguma, kitonekĩ letsa nye letsa kĩ ebõa ne katinya kame waa õdzõ ne ye ane kame. Ade ye mõ bóakena akunta ne boe kadzi kame akũ bokpa a.

Yesu Nyé Ɖsõfõnõkõẽ Flee a.

^{XIV} Foesũ mifõ bupi boe katekado a kĩ boanye katsa a budomõ akũ mõ õsĩ, kitonekĩ budeĩ Yesu, Baguma Obi kĩ enye Ɖsõfõnõkõẽ Flee a kĩ etsã ode flee kame ené edzi ne Baguma õwẽ a. ^{XV} Nné Ɖsõfõnõkõẽ Flee kĩ eláapuli enu boe katekado onukpẽ kado kayõ budeĩ, mbom oti kĩ ye malo besõ ye bedã ne osi nye osi akũ nde boe aye, leme etákena tõkpa tidima a budeĩ. ^{XVI} Foesũ mifõ budo õwõle bufuã Baguma kõnyakamõ legãkpo a, ayekĩ bóana Baguma semekale mõ kõnyakamõ fubumõ boe ne kasĩ lõkõ.

V

^I Bapau Ɔsofɔnɔkɔɛ Flee a odi nye odi katomena ye bakɔba kame, kate awe ne ye akũ kĩ edza ne be onukpɛ esum Baguma. Ye adzuma nye kĩ ekɔa bati futetsa ekpa Baguma, ebɔa afolie ne be tɔkpa akũ. ^{II} Ne ayekĩ ye mɔawe a elá kɔbɛ ne tisi pii akũ sũ ni, yana ɔwɔle bɔee kakpa bikĩ binyína kadi mɔ bikĩ beyela osi a. ^{III} Ade foesũ kene kĩ ebɔa tɔkpa afolie ne ye mɔawe lolɔ mɔ bati bebã tɔkpa flee leme akũ a.

^{IV} Odima lãdzina ye akũ Ɔsofɔnɔkɔɛ Flee kado ye akũ foe obu, mbom Baguma awe ye nde ayekĩ ene Aron a. ^V Ade ayea Kristo leme tádo ye akũ obu kĩ yanya Ɔsofɔnɔkɔɛ Flee, mbom Baguma lidzina ye ebi ye kĩ,

“Yĩ Obinyole anɛ.

Nviã luwi kĩ mma nɔ.”

^{VI} Ebuki ele ne kako bebã kĩ,

“Aanya ɔsofo daa,

ne Melkizedek osi a akũ.”

^{VII} Kĩ Yesu dzi nkpã ne tite akũ a, ebɔa mpaɛ, eke aduli mɔ fɔwɔla mɔ babe ekpa Baguma a kĩ ye lipuli enye ye ne wuda awe kame a. Baguma tse ye, kitonekĩ edɔla ye akũ ekpa Baguma ɔsum a.

^{VIII} Tito kĩ Baguma Obi yane malo ni, ekɔle osetie etomena ye lubokamɔ kame. ^{IX} Kĩ Baguma kena Yesu ekpɔla ne osi nye osi akũ a, edani oti a kĩ ye akũ bikĩ babu ye a flee aatsã bena nkpã kĩ elá kawũna a. ^X Ade ye nye oti a kĩ Baguma le eyi kĩ yaanya Ɔsofɔnɔkɔɛ Flee ne Melkizedek osi a akũ a.

Mitafɔne Mi Katekado a Awe.

^{XI} Fɔletsa pii deĩ kĩ bóale ne fukĩĩ akũ kufe, lɛme foe kayɔkanye deĩ ɔsĩ, kitonekĩ miápuli kanu fɔletsa kayɔ moatse. ^{XII} Fɔnye ɔnokɔali kĩ tito kĩ mo lɔko kĩĩ kenekĩ minya fɔtsa batsane malo ni, mibuki misĩ odi kĩ etsa mi Baguma fɔletsa kayɔkayi fude a. Mila nde akokɔa ame kĩ bisĩ teme mui, lɛme nné nde bikĩ bisĩ funitsã kĩ fudeĩ ɔsĩ. ^{XIII} Odi nye odi kĩ yameme ni, akokɔa ebuki yane, foesũ enyĩna letsama ne tokpa mo tuwĩ akũ. ^{XIV} Banokɔẽ anya funitsã kĩ fudeĩ ɔsĩ, kitonekĩ bevele be adzuni ne fɔtsa pii kame, kĩ foesũ bapuli kamo tokpa mo tuwĩ kayi ɔsũ.

VI

^I Foesũ mifɔ bɔnaa loto bokɔle banokɔẽ fɔtsa katsa, lɔkɔa bɔfɔne kayɔkayi fɔtsa a kĩ bɛtsa ne Kristo akũ a awe buyi. Mitafɔ bumuniki bɔnaayi kayɔ mo fɔtsa katsa ne ayekĩ bodani towɔle kame, bɔfɔne tudzuma kĩ tela nfaso, mo ayekĩ botɛ Baguma budo, ^{II} mo fɔtsa katsa ne mui kawola amaniɛ, awe kate ne bati akũ, kayidza kato kanokpa mo kadmɛna nkaɛ a akũ. ^{III} Mifɔ bɔnaa loto bubo anɛ! Ade letsa a kĩ nte Baguma tuno ni, bóakɛna a.

^{IV} Kitonekĩ nde bati a kĩ bimuniki ne be katekado liti a, aapuli bibuki bedani towɔle kame? Bena ne Baguma ohaĩ kame tɔ beta ode futetsa a onukpɛ bɛmó, bena Hũhũ Kpalewa a lɛme tsefã. ^V Ade beta letsa wĩ a kĩ lideĩ ne Baguma kale kame a onukpɛ bɛmó, bena katinya a kĩ kaaya a kame kobẽ a tsefã a. ^{VI} Lɛme bimuniki ne be katekado liti! Beláapuli bimuniki mo be bibuki bedani towɔle kame, kitonekĩ

bibuki babõa Baguma Obi a ne asendua akũ, kado ye konyoã ne kanade.

^{VII} Baguma ahila tite a, kĩ tamõa oni mui kafõ futse ame ne te akũ kana nfaso kakpa bikĩ be sũ banε foba ne te akũ a. ^{VIII} Leme nte fu mo tuwĩ kpa me ne te akũ ni, nfaso adima lelãa te akũ. Baguma aapuli edumu te ade ne kawũna kame a, baapila te mo fi.

^{IX} Nwaẽ ame, tito kĩ bõle foe lomo malo ni, mi kõ bõte budo kĩ minyina fotsa wĩ a kĩ fonene fobẽ, kĩ fofã mina nkpã kate. ^X Kitonekĩ Baguma lenye oti kĩ yaadã kpĩ, kĩ yaálela adzuma a kĩ mikena mo odo a kĩ minye mitsa ne yĩ dĩ sũ. Mibumena mi bakoba Kristofõ ade milamena be kabumena finyaa malo a. ^{XI} Boe kawε mo osĩ nye kĩ mi kame odi nye odi epi ye mbodi kaboa kame lomo kenaawo kawũna, ayekĩ mi awe aata letsa a kĩ de akũ miate anε a. ^{XII} Botáwe kĩ mikena onyone, mbom mikena fotsa nde bati kĩ bete bido, kĩ bideĩ owole bõεε, kĩ foesũ bena fotsa a kĩ Baguma le eyi kĩ yaakpa a.

Letsa a Kĩ Baguma Le Eyi a Lávemena.

^{XIII} Kĩ Baguma le eyi kĩ yaakpa Abraham fotsa a, etani ye moawe akũ ekpa ye, kitonekĩ odima lebẽ ye Baguma kĩ yaatani. ^{XIV} Ele kĩ, “Maahila no ade maakpa no babi mo bawa beblebee leme a.” ^{XV} Abraham na owole bõεε, foesũ ye awe ta letsa a kĩ Baguma ke otse kĩ yaakpa ye a.

^{XVI} Bati atani fotsa kave letsa a kĩ lebẽ be a kakoa katsua foletsu kavele a kame. ^{XVII} Ade foesũ Baguma tani fotsa ne ye bõhe a akũ a, kitonekĩ ewe kĩ foe kame fokpale bikĩ baate letsu a kĩ ele eyi a kĩ ye nhihie lelávemena da.

XVIII Foesũ Baguma kena fŏtsa nviã kĩ fŏnye bohe mo katani, kĩ foláapuli fŏdani, ade Baguma lemē leláapuli ema fŏvã ne foe akũ a. Ne fukĩ sũ ni, boe a kĩ bulo bŏnatani ye a bubuki bŏana ɔwŏle, bŏate ane ne letsa a kĩ ele eyi kĩ yaakpa boe a akũ. XIX Budeĩ kŏnete kĩ bŏkpa boe akũ ne boe kadzi kame, nde ayekĩ kutse tunu api koe kadzela kpili a. Kŏnete a akpã boe katsãmena lima a kĩ litsua kŏla a kame kawomena ne kako kpalewa flee a. XX Ade awĩ Yesu nya lotŏ ewo nde boe lotŏ ɔnyane aye, edani daa Ɔsŏfŏnkŏẽ Flee ne Melkizedek osi a akũ a.

VII

Melkizedek Nye Ɔsŏfŏ.

I Melkizedek kĩ nye Salem legã, ade enye Baguma Kpale a ɔsŏfŏ a. Kĩ Abraham to kawũ a kĩ ke kame enya fŏgã ena akũ yaya a, Melkizedek natselamŏ ye ehila ye. II Awã naa, Abraham kŏa kawũ kame fŏtsa a kĩ ena a flee katsu kawuade a ekpa ye.

Dĩ Melkizedek kayŏkanye katonyade nye kĩ Legã, fŏtsa kpĩ akũ ɔkenane. Kayade nye Salem legã kĩ fŏtsa kĩ Lukudŏ Legã. III Betále letsama ne ɔlega ñye ɔma akũ. Betále letsama ne ye babi mo bawa akũ, betátsa lokŏ a kĩ bema ye, ñye lokŏ a kĩ eku a. Melkizedek kĩ la nde Baguma Obi a ade enye ɔsŏfŏ daa daa a.

IV Midã ayekĩ Melkizedek te dĩ! Boe ɔwanyŏ Abraham nde otinŏkŏẽ malo a kpa ye kawũ kame fŏtsa a kĩ ena a kasẽ kame katsu kawuade a. V Ne mbla a onukpẽ ni, Levi babi mo bawa kĩ banya basŏfŏ a deĩ osi kĩ bate fŏtsa kasẽ kame

katsu kawuade ne Israelfo awe, tito ki be malo benye Abraham kasinu kame babi malo. ^{VI} Ade Melkizedek tato Levi kasinu a kame a, leme ete fotsa katsu kawuade etomena Abraham sekẽ, ade ehila ye oti a ki Baguma kpa bohe a. ^{VII} Atsindze adima lelãa foe kame ki oti a ki yakpa nhila a be oti a ki ye bihila a. ^{VIII} Ne basofa semake ni, batidziwa ki baku a ate fotsa katsu kawuade, leme ne Melkizedek semake ko ni, oti ki bidi adansie ne ye aku ki edzi nkpã daa, nde ayeki Baguma foletsa a le a, lete fotsa a. ^{IX} Foesu bõapuli bole malo ki, Levi ki yate fotsa kasẽ kame katsu kawuade a malo kpa fotsa etsãmena Abraham aku, ^X kitoneki betãma to Levi, leme nte bõale ni, ena ne owanyo Abraham kate kame ne loko a ki Melkizedek natselamõ owanyo a.

^{XI} Levifo a tosofo kanya kame fotsã mo bekpa Israelfo mbla a. Ade finyaa nte Levifo tosofo kanya a kakpola kekpola ni, kufe fotãsi ki osofo bebã nde Melkizedek aye ebuki ene, ki nnẽ Aron kasinu a kame eto. ^{XII} Kitoneki nte bevemena tosofo kanya a ni, kene ki kavemena keya ne tosofo kanya mbla a leme kame. ^{XIII} Boe Olate ki ye aku foletsa bolamena kale a to katete bebã kame, ade ke katete a kame obi odima tãnya to osofo a. ^{XIV} Fone fowaa pefee ki Yuda katete kame bema ye, leme Mose tabõa katete ki di ele tosofo kanya letsama.

Yesu La Nde Osofo Melkizedek Aye.

^{XV} Foletsa ki kame kpale fõba ki osofo bebã ki ela nde Melkizedek aye ya. ^{XVI} Oti ki nya osofo nnẽ ne batidziwa mbla onukpẽ, mbom etsã

nkpā kī ela kawūna a kōbē akū eya. ^{XVII} Kitonekī Katsēle Kpalēwa a lē nē ye akū kī,

“Aanya ɔsɔfo daa,

nē Melkizedek osi a akū.”

^{XVIII} Foesū benye mbla kōe a biyi nē ɔwē, kitonekī etána kōbē iye nfaso adima. ^{XIX} Kitonekī Mose mbla a tápuli ekēna letsama lēkpola. Finyaa budeī kōnete kī kōnene kōbē, kī bōtsē koe akū bōafuā Baguma.

^{XX} Fukī fubu nye kī Baguma lo fubo nē tɔsɔfo kanya kī akū. Kōkōe a Baguma táló fubo ekpa bikī bidzina basɔfo a. ^{XXI} Lemē kī Yesu yanya ɔsɔfo a, Baguma lo fubo ekpa ye ele kī,

“Boe ɔlate a lo fubo

ade eláadani ye adzuni a,

‘Aanya ɔsɔfo daa.’ ”

^{XXII} Fubo kī sū Yesu dani apam a kī enene ebē kɔlaa a liti ɔdzanē.

^{XXIII} Ntsitsemu bebā buki edeī. Kōkōe a basɔfo nē lidede, kitonekī bekaku mɔatse mɔatse kafone adzuma a. ^{XXIV} Lemē kī Yesu kō dzi nkpā daa sū ni, ye tɔsɔfo kanya a leláato ye akū tenaa odima akū. ^{XXV} Foesū yaapuli ete bati a kī batsā ye akū kaya nē Baguma sekē loko nye loko, kitonekī edzi nkpā daa, ade yake Baguma aduli kakpa be a.

^{XXVI} Foesū Yesu nye ɔsɔfonokōē Flee a kī busī. Enye oti kpalēwa kī nfumusu adima leláa ye akū, ade tɔkpa tidima leláa ye akū a. Benye ye nē tɔkpa bakenane kame, ade bedela ye flee etē ode a. ^{XXVII} Yesu lelá nde basɔfonokōē nkae a, ade fótásī kī yaboa afolie luwi nye luwi nē ye mɔawe tɔkpa akū, loko ke liti ebōa nē bati bebā tɔkpa loló. Ebōa afolie deedimɔape ekpa foko

a flee, ne loko a kī ekōa ye akū eboa afolie a. **XXVIII** Mose mbla a apau banyole kī badō kadzina be basofonokōē flee, leme Baguma tsā ye fubo kalo akū ne mbla a liti a, epau Obi a kī ekena ye ekpola a yanya osofonokōē flee daa.

VIII

Yesu Nyé Boe Osafonokōē Flee.

I Kale titiliwu ne foletsa a kī bolamena kale a kame nye kī budeī Osafonokōē Flee kīi odu, kī edzi ne Obu Legā Kpale legākpo a somona ne ode.

II Yasum nde osafonokōē aye ne Kako Kpalēwa Flee a kī kenye lima patampa wī a kame, kī nné otidziwa leboa de, mbom boe Olate a leboa de.

III Badzina osafonokōē flee kame odi nye odi kī ekōa afolie fotsa ekpa Baguma eboa afolie leme, foesū kene kī Osafonokōē Flee kīi leme ena afolie litsedi ekpa Baguma. **IV** Ade nte tite akū edzi ni, kufe eláanya osofō kōlaa, kitonekī basofō a kī be akōa futetsa kakpa Baguma ne Yudafō mbla a onukpē a deī kōkōe. **V** Adzuma kī bakena nde basofō aye ne kasumkō la nde fukī fudeī ne ode a kuyo odi.

Ade foesū kī Mose aabōa Lima Patampa Kpalēwa a ni, Baguma bi ye kī, “Dā kī okena ne letsa nye letsa a kī betsa nō ne oto akū a onukpē.”

VI Leme finyaa Baguma kpa Yesu osofō adzuma kī enene ebē basofō a tide kōlaa, nde ayekī apam a kī ekena ne Baguma mō ye bati kayite a nene ebē a, kitonekī bekēna ye ne bohe a kī enene ebē a akū.

VII Nte mfumsu adima etana ne apam atonyade a akū ni, kufe foláabuki fusī kī bakena ayade.

VIII Lemε Baguma amɔ mfumsu ne ye bati akū kī
εε kī,

“Boe ɔlate a le kī,
fuwi fudi aya kī maakena apam vɔẽ mɔ
Israel kade a
mɔ Yuda kade a lemε.

IX Apam kī lɛláana ndε ekī
nkena mɔ be bawanyɔ
ne lɔkɔ a kī mpi be ne akpɔ
nkpā be nnemena ne Egipte tite akū a.
Kitonεkī betákena ne apam a kī nkena mɔ be a
akū,
foesū yī malo mbɔa kanε nkpa be.”

X ɔlate a buki εε kī,
“Ade apam kī maakena mɔ Israel bati
ne fuwi a kī fɔaya a liti a.
Maakɔa yī mbla ndo ne be adzuni kame,
ade maatsεε ye ne be tɔwɔε kame a.
Maanya be Baguma,
ade be baanya yī bati a.

XI Odima lɛláabuki εtsa ɔkɔba fɔtsa
īye ebi ɔwaẽ kī, ‘Nyi Baguma,’
kitonεkī odi nyε odi aanyi yī
kito babisẽ akū kenawo banɔkɔẽ akū.

XII Maamɔ be kɔnya ne be ɔbla kpa a kī bebɔa
akū,
ade nláabuki nte anε ne be tɔkpa akū kɔlaa
a.”

XIII Kī Baguma le kī apam vɔẽ a, fɔatsa kī ekena
atonyade a akɔε. Ade finyaakī lɛtsa nyε lɛtsa kī
lɛkena lɔkɔε ni, owi lɛláabuna mɔ laatẽ lenaa.

IX

Baguma Kasum Ne Tite Mɔ Ode.

^I Apam atonyade a na tɛbla kī te akū batsā kasum, mō tite akū kola, awā kī basum lemɛ. ^{II} Bike patampa bekɔa lima besē ye kamɛ. Bave kako katonyade a kī Kako Kpalɛwa, ade awā lemɛ bike ɔsɛdza otse mō opunu a kī ye akū bate abodoo kakpa Baguma a. ^{III} Nɛ kola kamɛ katsua lima a liti ni, patampa bebā deī kī bave Kako Kpalɛwa Flee. ^{IV} Fɔtsa a kī fudeī nɛ awā nyɛ sika ngbā atenyɛ a kī ye akū bate lifii ɔnyɔ, apam adakā kī bidue mō sika ngbā. Adakā a kamɛ fɔtsa a nyɛ sika ngbā okluwa kī funitsā kī bave mana deī nɛ ye kamɛ, Aron otse kī yake katsā, kī enyɛ toota, mō boe tratra nviā kī be akū betsele mbla ewua a bite a. ^V Bɛmɛ Kerubifŏ kutidu bɛdzɛ nɛ adakā a akū, kī banye Baguma kukūkpale katsa, ade bɛdzele be fupoki bɛtsa awā kī bakɔa bati tɔkpa kate a. Lemɛ boláapuli bɔle kɔdzela nɛ fɔtsa a na flee akū dzununuunu finyaa.

^{VI} Ade nte bɛmanɛ fɔtsa a biyi lomɔ a, basɔfɔ awo nɛ Patampa atonyade a kamɛ kakɛna be tɔsɔfɔ adzuma. ^{VII} Lemɛ Ɔsɔfɔnɔkɔɛ Flee a odi awo nɛ kola koyade a kamɛ deedimɔape nɛ kateli kamɛ. Nte yanaa a, kenekī yalɛ bayae babɔanɛ kī yaakɔa ebɔa afɔlie ɛkpa Baguma nɛ ye mɔawɛ tɔkpa mō tɔkpa a kī bati kenɛ nɛ katanyi kamɛ a lolɔ. ^{VIII} Nɛ nhihie kī onukpɛ ni, Hūhū Kpalɛwa a nyɛ ɛtsa kī, nɛ ayekī patampa atonyade a buki ɛdzɛ sū ni, osi tábinya kī bati biwo nɛ Kako Kpalɛwa Flee a kamɛ. ^{IX} Fukī nyɛ nfantuhū fɔtsa katsa fɔkpa nviā fuwi kī. Fɔtsa kī afɔlie mō futetsa a kī bakpa Baguma a lápuli kafɔ basumunɛ a ɔwɔle kamɛ akpale flefle, ^X kitonekī be ɔsum a manɛ mō funitsā, bave mō

akū kakpale temanie aholo aholo odi. Fukī flee nye katinya kame tebla kī bakena kenaawo loko a kī Baguma aalola foe.

XI Leme Kristo ya kokoe nde Osophonokoē Flee ekpa fotsa wī a kī foya kokoe a. Patampa Kpalewa a kī ye kame yasum a pone lububu, ade ekpola eba akoe a. Ade ye kō nné patampa kī batidziwa like ye, ade foe nye kī étáto katinya kī kame. **XII** Kī Kristo wo ne patampa a kame enaa Koko Kpalewa Flee kame deedimape a, étáko kutukpabi mo banantsue babi baboane eboa afolie, mbom ye moawe baboane ekoa evele nkpā kī elá kawūna ema boe.

XIII Kutukpabi, banantsue baboane mo onantsue obi kī bipila ye bato bakoa kasā ne oti a kī efī deī ne ye akū, loko ye akū akpale. **XIV** Ayekī fukī nye onokoali sū ni, nde mo Kristo baboane leláakena fotsa kpale kolaa? Kristo tsā daa Hūhū Kpalewa a kobē akū, ekoa ye a kī efī adima leláa ye akū a, eboa afolie ekpa Baguma. Ye baboane a akpale boe towole kame, enye boe temanie kī telá nfaso ayekī bóapuli busum Baguma a kī edzi nkpā a.

XV Ade fukī sū Kristo kena apam voē a kame okpolane, ayekī bati a kī Baguma ve a, aana daa adzapadie a kī ele eyi a. Fukī aaya ne foe kame kitonekī oti liku, ade fonye tokpa a kī bati kena ne apam atonyade a kame a.

XVI Awā kī adzapadie akū ovoli deī ni, baákena ye akū adzuma nte betámó foe kame kī ovoli a okonane ku, **XVII** kitonekī adzapadie akū ovoli lenyé letsama nte oti a kī ekena ye a dzi nkpā.

Mbɔentɛ oti a ku fɔmɔ baapuli bɛkena ye akũ adzuma. ^{XVIII} Ade foesũ apam atonyade a malo ni, betáne babɔanɛ liti bɛkena ye adzuma.

^{XIX} Mose nya lotɔ ede letsã nɛ tɛbla flee a kĩ tideĩ nɛ mbla ovoli kame a ɛkpa bati a. Ke liti a, ɛkɔa mui ɛtɛka mɔ kutukpabi mɔ banantsue babɔanɛ, ɛkɔa kuveli tɛtsã mɔ tuwĩ mɔ olɛ ɛta ade ɛnye ɛsã nɛ mbla ovoli a mɔ bati a flee akũ. ^{XX} Ɛlɛ kĩ, “Ade apam a kĩ Baguma kena mɔ mi a kĩ mikena nɛ ye akũ a babɔanɛ nɛ awĩ a.” ^{XXI} Ade ayea Mose lemɛ akɔa babɔanɛ kasã nɛ Patampa Kpalɛwa a mɔ fɔtsa a kĩ foe akũ adzuma bakɛnã nɛ kasum kame a flee akũ a, ^{XXII} Ɔnɔkɔali, bɔapuli bɔlɛ kĩ nɛ mbla a onukpɛ ni, babɔanɛ bakɔa kakpalɛ letsã nɛ letsã akũ, ade nɛ betáko babɔanɛ nɛ tite ni, tɔkpa kakɔa kate láya.

Kristo Kɔa Ye Akũ Ɛbɔa Afɔliɛ Ɛnye Tɔkpa.

^{XXIII} Foesũ fusĩ kĩ bekpale fɔtsa a kĩ fɔla ndɛ ode fude kuyo a akũ nɛ osi kĩ akũ. Lemɛ ode fɔtsa a mɔawɛ kɔ afɔliɛ kĩ ɛnɛnɛ ɛbɛ tite akũ ade bɛkɔa bekpale foe akũ. ^{XXIV} Kitonɛkĩ Kristo táwo ɛnaa Patampa Kpalɛwa a kĩ batidziwa like, kĩ ɛnye ode fude a odi kuyo a kame. Ewo ɛnaa ode mɔawɛ a, awã kĩ finyaa ɛnanye ye akũ nɛ Baguma anɛ nɛ boe onukpɛ. ^{XXV} Lemɛ Kristo táwo nɛ awã kĩ yakɔa ye akũ ɛbɔa afɔliɛ ebuli ndɛ ayekĩ Yudafɔ Ɔsɔfɔnɔkɔɛ Flee a akɔa ɔyae babɔanɛ kawomɛna nɛ Kakɔ Kpalɛwa Flee a kame kateli nɛ kateli a. ^{XXVI} Kitonɛkĩ nɛ aye fɔla ni, kufɛ kɛnɛ kĩ ɛkaamɔ lubo lɔkɔ pii, kito anɛ katinya kayɔkayi a. Lemɛ finyaa kĩ katinya anaa kawũna a, Kristo

ya deedimɔape kī yakɔa ye akū ebɔa afɔlie enye tɔkpa.

XXVII Baguma hihie kī otidziwa eku deedimɔape, ade ne wuda liti a, yaadzemo ye. **XXVIII** Ade ayea Kristo leme kɔa ye akū ebɔa afɔlie deedimɔape, enye bati pii tɔkpa a enamena a. Yaabuki eya leyade, leme eláabuki ekena letsama ne tɔkpa akū, mbom yaate bati a kī bidzi badā ye ane a bena nkpā kī elá kawūna a.

X

I Yudafɔ mbla a lenyé fɔtsa wī a kutidu, mbom ela nde fɔtsa wī a kī fɔaya a kuyo keke. Ne mbla a onukpē ni, kateli nye kateli basɔfo a abɔa afɔlie mɔape a kakpa Baguma. Ade foesū nte fɔtsā mbla kī akū ni, beláapuli bekena bati a kī baya ne Baguma sekē a bekpɔla da a. **II** Nte bipuli bekpale bati a kī basum Baguma a akū deedimɔape ni, kufe be tɔwɔle leláabuki tekako be kɔto bio kī tɔkpa deī ne be akū, lokɔa befɔ afɔlibɔ flee kabɔa. **III** Leme nde ayekī fɔla a, kateli nye kateli afɔlibɔ afɔ bati akai be tɔkpa keke, **IV** kitonekī banantsue mɔ kutukpabi babɔane leláapuli benye tɔkpa da.

V Ne fukī sū kī Kristo aaya ne katinya kame a, ebi Baguma kī,

“Aáwe afɔlibɔ mɔ futetsa,
mbom okena sukena okpa yī.

VI Jyae kī bipila ye lodo ne afɔlibɔ atenye akū
īye tɔkpa kanye afɔlie
láwo no ane.

VII Ade ke nle kī, ‘O Baguma, amɔ yī ne awī.

Īya kī mayaakena nɔ kawɛ
nde ayekī betsele ne yī akū
ne Katsɛle Kpalɛwa a kame a.' "

VIII Enya lotɔ ɛle kī, "Aáwɛ afolibɔ, mɔ futetsa,
īye ɔyae kī bapila ye ne afolibɔ atenyɛ akū, mɔ
tokpa kanye afolie láwo nɔ anɛ." ɛle fukī tito
kī babɔa afolie kī flee ne mbla a onukpɛ malo.

IX Ade ke ɛle kī, "O Baguma, amɔ yī ne awī.
Īya kī mayaakena nɔ kawɛ." Ne osi kī akū a,
Baguma fɔne afolibɔ kɔɛ a flee awɛ ɛkɔa Kristo
afolie a edo ne te kadokɔ. X Ayekī Yesu Kristo
kena Baguma kawɛ akū, ɛkɔa ye akū ɛbɔa afolie
deedimɔape, ɛkpa fɔkɔ flee ɛkpale boe akū.

XI Yudafɔ ɔsɔfɔ odi nye odi akena ye ɔsɔfɔ
adzuma luwi nye luwi, kabɔa afolie mɔape a
kabuli, tito kī afolibɔ kī leláapuli enye tokpa
malo. XII Lemɛ kī Kristo kɔa ye akū ɛbɔa
afolie mɔape ne tokpa akū eyua a, ɛnadzi ne
Baguma sɔmɔna, XIII awā kī edzi yadzɔle lɔkɔ a kī
Baguma aakɔa ye bakesīne ɛkena ye abɔa katekɔ.
XIV Kristo kɔa afolie mɔape a kī ɛbɔa a, ɛkena bati
a kī bekpale be akū a bekpola daa.

XV Hūhū Kpalɛwa a lemɛ adi adansie ne foe
akū. Enya lotɔ ɛle kī,

XVI "Boe ɔlate le kī,
'Ade apam vɔɛ kī maakena mɔ be,
ne lɔkɔ kī laya a kame a.

Maakɔa yī mbla a ndo ne be towɔle kame.

Ade maatsɛle ye ne be adzuni kame a.' "

XVII Ebuki ɛle kī,

"Nláabuki nte anɛ ne be tokpa mɔ be ɔbla kpa
akū."

XVIII Foesũ nte bekɔa fukĩ flee bite ni, tɔkpa kanye afolie tábuki esĩ.

Mifõ Bufuã Bɔya Ne Baguma Sekẽ.

XIX Foesũ nwaẽ ame, bɔtsã Yesu wuda akũ, bɔna osi faa kĩ bɔapuli buwo ne Kakɔ Kpalewa Flee a kame. XX Ebinya nkpã osi vɔẽ ekpa boe etsãmena lima a kĩ lesẽ patampa kame a kĩ ledza lekpa ye sukena a. XXI Budeĩ Ɔsofo Kpale kĩ ye adãmena Baguma toto a akũ, XXII foesũ mifõ bɔkɔa ɔnɔkɔali ɔwɔle, mɔ katekado kĩ kitim, mɔ tɔwɔle kĩ tekpale kĩ kɔtɔkaku lelãa, mɔ sukena kĩ bewɔla se mui kleĩkleĩ bufuã Baguma. XXIII Mifõ bupi konete fɔletsa a kĩ bɔanye katsa a budomɔ akũ pintii ne boe katekado kame, kitonekĩ bɔapuli bɔte Baguma budo kĩ yaakena ne letsa a kĩ ele eyi a akũ. XXIV Mifõ bɔkɔna ayekĩ bɔado boe bawaẽ kɔbẽ bibumena akũ akũ, bewɛ akũ kale, bekena tudzuma wĩ lemɛ. XXV Mitafõ bɔfõ boe katsena kanaa nde ayekĩ mi kame badi akena a, mbom mifõ budo akũ kɔbẽ bubu, kitonekĩ mimó kĩ boe Ɔlate Luwi a lamena kafuã.

XXVI Kitonekĩ nte bunyi ɔnɔkɔali a buyua, mɔ bubua pa bɔakena tɔkpa ni, afolie adima buki elãa kĩ yaapuli enye tɔkpa. XXVII Mbom letsa a kĩ lite nye kĩ bɔadzi bɔkadã Kadze mɔ libe a kĩ laaya a anɛ, mɔ fi geĩgeĩ a kĩ fɔawɔla Baguma bakesĩne a! XXVIII Nte odi fum Mose mbla a ni, baámɔ ye kɔnya, kakɔ bakɔ ye nte bedza ne bati nviã iye bati elale adansie kadi akũ.

XXIX Kekõ mikɔna midã ni, litsa sɔtɔ kavele aaya ne oti a kĩ esupa Baguma Obi a, kĩ ebu Baguma apam babɔane a kĩ ekɔa evɔle tɔkpa ne ye akũ a fɔtsa pupulidza? Litsa lemɛ miakɔna kĩ

laaya ne oti a kī yasupa Hūhū Kpalewa a kī yamo bati konya a akū? Mikona midā soto kavele mo osī a kī baakpa ye a! **XXX** Kitonekī bunyina oti a kī ele kī, “Yī aavia tokpa kotokase, yī aase te koto.” Ebuki ele kī, “Boe Olate a aadzemo ye bati.” **XXXI** Fonye libe paa kī odi aawo ne Baguma kī edzi nkpā a kalokpa kame!

XXXII Mite ane ne fuwi a kī fotē, kī minya loto minyi Baguma laa a. Ne lokō a na kame a, kī Baguma ohaī ko ne mi akū a, mido owole mipili mo osī tito kī mimó lubo pii malo. **XXXIII** Foko fudi bavūna mi ne kanade, kakena mi awoda. Foko bebā leme miakoa mi akū kabumena bikī bamona be lubo kī odu a. **XXXIV** Ne onokoli kame ni, mimó lubo nde bati a kī bewaa kola, ade tito kī bekōa kobē bete mi akū fotsa flee ne mi awe malo ni, mido owole mite foe mo kawole, kitonekī minyina kī mibuki mideī letsa a kī lenene lebē, kī laana daa a.

XXXV Foesū akpo etaveli mi, kitonekī fōama mi kotokase kpale. **XXXVI** Fusī kī miana owole boee, ayekī miapuli mikena ne Baguma kawē akū, lokoa mi awe aata letsa a kī ele eyi a. **XXXVII** Kitonekī Katsela Kpalewa a le kī,

“Kite sukuloo oti a kī yaaya a, aaya, ade eláabuna owi a.

XXXVIII Yī oti kpī aate yī edo, edzi nkpā.

Leme nte odi muniki liti ni,
eláabuki ewo yī ane.”

XXXIX Leme boe kō bonyé bati a kī bamuniki liti kanaa kayela kame, mbom budeī kate kado ade bona nkpā kate a.

XI

Katekado Akū Nfantuhū.

^I Katekado nye fɔatsa kī nɔ anɛ teĩ nɛ foe akū a anɛ kadā mɔ fɔtsa a kī aámɔ mɔ anɛ a foe katekado kī fudeĩ. ^{II} Katekado akū fɔtsā mɔ Baguma mɔ kawɔlɛ nɛ boe atitifɔ bawanyɔ a akū a.

^{III} Katekado kame fɔtsā mɔ bunu foe kayɔ kī Baguma kale a ekɔa ebɔa katinya, ayekī letsa a kī bɔámɔ a, ekɛna de etomena letsa a kī bɔámɔ mɔ anɛ a kame.

^{IV} Katekado lɛfɔ Abel bɔa afɔliɛ kī ɛnɛnɛ ebɛ Kain ade ekpa Baguma. Ye katekado kame etsā ɛna Baguma adansie nɛ ye akū kī ɛnyɛ oti kpīĩ, kitonɛkī Baguma mɔawɛ letɛ ye futetsa a. Tīto kī Abel ku malo ni, etsā ye katekado kame ebuki yalɛ kɔdzɛla nviā.

^V Katekado lɛfɔ bɛbɔɛ Henok bɛnamɛna ode kī ɛtáku. Odima tábuki ɛmó ye, kitonɛkī Baguma yabɔɛ ye ɛnamɛna ode. Fɔmɔ ebɔɛ ye ɛnamɛna ode a ni, Katsɛlɛ Kpalɛwa a di adansie nɛ ye akū kī ye fɔletsɛ wo Baguma anɛ. ^{VI} Ntɛ odi lɛlá katekado ni, ye fɔletsɛ lɛláawo Baguma anɛ, kitonɛkī odi nye odi kī yaya nɛ Baguma sɛkɛ ni, kɛnɛ kī ɛna katekado kī Baguma deĩ, ade ɛnyɛ bikī bawɛ ye liti osi a kɔto osenɛ a.

^{VII} Katekado lɛfɔ Noa tɛ Baguma kɔdɛ nɛ fɔtsa a kī fɔaya kī ɛláapuli ɛmó a akū. Ebu Baguma ade ke ɛmɛ mui anɛ adakā kpale kī ɛnyɛ ye mɔ ye toto bati a. Nɛ fukīĩ sū ni, ye katekado nye kɛtsa kī katinya kame bati ku kɔto ade Baguma bɔɛ ye kī ɛnyɛ oti kpīĩ a.

VIII Katekado lefŏ Abraham bu Baguma, kī eɛe ye kī edzakū enaa tite a kī taanya ye adzapadie akū a. Ade edzakū ne ye moawe tite akū enaa awā kī enyina malo a. **IX** Katekado ekoa enanya ononōē ne tite a kī Baguma le eyi yaakpa ye a akū. Edzi ne patampa kame, ade ayea Isak mo Yakob leme dzi ne tepatampa kame a, tito kī bekpa be tite moape a bohe a. **X** Abraham kena foe lomō, kitonekī ekadā ane kakpa omato kpale a kī Baguma awe tsua edzē ne kayokayi futekū mo osī akū.

XI Katekado lefŏ Sara leme na kobē epuli etsāmō kōma, tito kī ekena katsokpa malo, kitonekī ebu Baguma a kī ekpa ye bohe a onokwalini. **XII** Foesū kito Abraham moape a kī eku eyua malo a kame babi mo bawa kī bene lidede nde fusibii, mo mpo abuī dā kī belāapuli bekā a né bito a.

XIII Bati kīī flee ku ne be katekado kame, kī be awe táta letsa a kī Baguma le eyi kī yaakpa be a. Leme bemó foe mo lugo, bete foe mo kawole ade bitunō ne foe akū kī banonōē mo basitsāne banē ne tite kīī akū a. **XIV** Kitonekī bati a kī bale foletsa kīī odu a, nye betsa pefee kī belamō be moawe tite kawē. **XV** Nte tite a kī te akū bedzakū a bekakōna ni, kufe bena osi bimuniki bēnaa te akū. **XVI** Mbom bekawe tite kī tenene tebē, kī tenye ode tide a leme. Ne foesū foáko Baguma konyōā kī bave ye kī be Baguma, kitonekī elola omato kpale odi eyi be.

XVII Katekado lefŏ Abraham kōa ye obi Isak eboa afolie, loko a kī Baguma so ye edā a. Tito kī obi a na Baguma le eyi kī yaakpa Abraham malo

ni, etuno faa kī yakoa ye obinyole moape a eboa afolie ekpa Baguma. ^{XXVIII} Baguma bi ye kokaē kī, “Isak akū fōatsā mo aana babi mo bawa a kī nle iyi a.” ^{XXIX} Abraham kona kī Baguma aapuli edzela Isak etomena kanokpa malo. Ade foesū emuniki ete ye obi nde wuda kame bedzela ye bitomena a.

^{XX} Katekado lefō Isak hila Yakob mo Esau ne fotsa a kī fōaya a akū a.

^{XXI} Katekado lefō kī Yakob aaku a, ehila Yosef babinyole a, ade kī ekena lolō ete ne ye otse kī yake katsā akū a, esum Baguma.

^{XXII} Katekado lefō kī Yosef aaku a, ele eyi kī Israelfō aadzakū ne Egipte tite akū, ade etsa ayekī bekena mo ye fotsō a.

^{XXIII} Katekado lefō kī bema Mose a, ye bamane kola ye tideto elale, kitonekī bemó kī yale kadā paa, ade betāvila mbla a kī Egipte Legā si a katu a.

^{XXIV} Katekado lefō kī Mose bo ane a, esī kī betave ye kī Egipte Legā obitsole obi. ^{XXV} Mbom ewe kī yamo lubo mo Baguma bati keba kī yamo tokpa kame omene loko lukū lidi. ^{XXVI} Mose kona kī konyōā a kī baado ye ne Kristo sū te koya paa koba akū kana fotsa flee a kī fudei ne Egipte a, kitonekī ekōa ane ete ne kotokase a kī Baguma aakpa ye ne loko kī laaya a akū. ^{XXVII} Katekado lefō Mose dzakū ne Egipte, kī etāvila legā kalokpa a. Edo owole etāmuniki liti, ekena nde yamo Baguma a kī boāmō mo ane a. ^{XXVIII} Katekado Mose kōa eyi Wuda Katē Luwi a, ade efō bekōa baboane bikputa ne be tunyukpē titse akū, ayekī

ode fŏto ɔnyane a leláako Israelfŏ babinyole batonyade a.

XXXIX Katekado lefŏ Israelfŏ puli bitsua Mpo Ngbã a binyina nde tite akũ betsẽ. Kĩ Egiptefŏ boã mbodi kĩ be malo banyina a ni, bekamu ne mui a kame. **XXX** Katekado lefŏ Yeriko ɔmato foebi a kĩ Israelfŏ tsã bisinya foe fuwi evũkɔno a veliveli.

XXXI Katekado lefŏ betáko Rahab ɔdɔpaani a bibumɔ bati a kĩ betábu Baguma a, kitonekĩ ete Israelfŏ a kĩ bebela benadã tite a kame mɔ kawole.

XXXII Litsa mbuki nle mbu? Lokɔ leláa kĩ maale fŏletsã ne Gideon, Barak, Samson, Yefta, Dawid, Samuel mɔ Baguma onukpẽ banyene a akũ. **XXXIII** Betsã katekado kame benɔ mɔ fude pii benya be akũ. Benya akũ ne osi kpĩ akũ, ade bena fŏtsa a kĩ Baguma le eyi kĩ yaakpa be a. Badi sua dzata tunukpẽ, **XXXIV** badi dina fi geĩgeĩ, ade fofŏ kĩ badi lo ne kawũ onukpẽ a. Katekado fŏ bikĩ bekena kpetee a na kobẽ, ade bena ɔsĩ ne kawũ kame benɔ benya banɔvɔẽ kawũ banone akũ a. **XXXV** Katekado kame fŏtsã mɔ batsole te be akũ bati banokpa kĩ bedzela bidzi nkpã. Ne katekado sũ bati bebã kĩ betáwe kĩ benye be ne kola fone be akũ awe bekena be awɔda biku, ayekĩ baadzela be bidzi nkpã kĩ enene ebẽ a.

XXXVI Bidi badi nsekuo, bibo be mɔ mple, ade bido badi nkɔsonkɔsɔ benado ne kola kame a. **XXXVII** Betale badi boe, bebẽ badi ne kayite mɔ ɔsae, beko badi mɔ apã. Badi na ne baveli iye kutukpã tuvoli kame betsã bekamini ne ohiã kame, bitomɔ be liti ade bekena be awɔda a. **XXXVIII** Ne be kale sũ katinya kĩ tákpa be kadzi!

Betsã bekamini nde bati kī bilo kawū ne kosa kame, bidzi ne toto akū, bebela ne toto teke mo tite foke kame.

^{XXXIX} Leme bati kī flee kī be katekado di adansie ne be akū malo ni, be kame odima awe táta letsa a kī Baguma le eyi a, ^{XL} kitonekī Baguma kena nhihie kī enene ebē eyi ekpa boe. Ye botae nye kī eláne boe liti ekena be bekpola.

XII

Baguma Nye Boe Olega.

^I Ne foe sū ni, kī budeĩ bati kodabu kī odu kī bisinya boe, bado boe kobē sū ni, mifō bonye folotsa fudi nye fudi kī futeĩ ne boe akū, mo tokpa a kī tēmane ne boe akū buwula, lokoa buwula atse a kī ewaa ne boe loto a mo koneyoole. ^{II} Mifō bokoa ane bute ne Yesu akū daa, oti a kī ye akū boe katekado dzē a, kito kayokayi kenawo kawūna a. Kī enyina kawole a kī kadzole ye a sū ni, edo owole emó lubo ne asendua akū, ade etábu asendua akū wuda konyoã letsama a. Leme finyaa ene edzi ne Baguma legākpo a somona.

^{III} Mikona letsa a kī de kame Yesu tsã etē a, mo ayekī emó lubo kī tokpa bakenane yidza bedza ne ye akū pii a midã. Ne foesū mitafō akpo liveli mi mimuniki ne ye liti. ^{IV} Kitonekī ne mi kanō mo tokpa kame a, mitáno miwo tō awã kī baako mi baboane ne tite. ^V Mbōee milela owole kado foletsa a kī Baguma abi mi nde ye babi a? Ade foe nye kī,

“Yī obi, nte Olate a vele nō soto ni, tabu foe fotsa kabii.

Nte ekã nō ane ni, tafō foha nō owole.

VI Kitonekĩ oti a kĩ boe ɔlate awɛ kale ni,
ade ye yavele soto a.
Ade odi nye odi kĩ ete ye tibi ni,
yavele ye soto.”

VII Nte miamo soto kavele lubo ni, mido owole.
Mi lubo kamo a atsa kĩ Baguma lamena mi kavele
nde ye babi aye. Obisẽ odi deĩ kĩ ɔlega lávele
ye soto? VIII Nte baávele mi nde ayekĩ yavele ye
babi flee a ni, fɔatsa kĩ minyé ye babi kpanunu
a, mbom minye oti bebã babi. IX Fukĩ fubu nye
kĩ budeĩ tite akũ balega kĩ bavele boe soto, leme
boakoa obu kakpa be. Nde sũ boláadola boe akũ
bɔkpa boe hũhũ ɔlega pii foba lokoa budzi nkpã?
X Boe balega a avele boe soto loko lukũ odi nde
ayekĩ fɔnɛɛ be. Leme Baguma kɔ akena foe ne
boe kale sũ, ayekĩ bóanya bati kpalewa nde ye
aye. XI Nte bavele boe soto a, fawo boe kalɔe ne
loko a kame, ade kawole láde boe a. Leme ke liti
a, fɔafɔ be a kĩ bevele be a akena bati kpĩ, kana
lukudo ne nkpã kame.

Bekpa Kɔde Bisi Mbla Leme.

XII Foesũ mido akpo a kĩ edo a, mo mi aduli a
kĩ edoũdoũ kobẽ. XIII Mikaatsã tisi yedede akũ
ayekĩ oti kĩ ene lekpe a koboa leláatẽ ye, mbom
kĩ yaana foso katsa.

XIV Miboa mbodi kĩ miadzi ne lukudo kame
mo odi nye odi, midzi nkpã kĩ ekpale, kitonekĩ
odi kĩ etákpale lelápuli emoo boe ɔlate a.
XV Midã kadã wĩ kĩ mitáyela Baguma konyakamo
a. Mitafɔ odima lekena nde tuwĩ mo onye tibo
ane, tido ohau mo efĩ ne bati pii kame. XVI Mitafɔ
odima lekena adopaa, ãye ekena oti kĩ enyina

Baguma nde Esau, kī eno ye tibinyole lonokoẽ ete funitsã soodaẽ moape a. ^{XVII} Nde ayekĩ minyina a, ke liti a Esau we kī olega ekpa ye nhila a, leme etákpa ye, ade titõ kī ekõa kabe ewe kī yadani letsa a kī ekena a malo ni, etána foe akū osi.

^{XVIII} Nné Sinai oto a kī oti aapuli ekõa awe eta a sekẽ miya. Fólá nde ayekĩ Israelfo mó fi geĩgeĩ katẽ ne ye akū, kī otũ ke, fokena kusuu, ade owe kpale kavũ a, ^{XIX} mo kī binu kagbulee kavõ mo odo a kī ele kodzela a. Kī odo a ne a, bike aduli kī oti a etabuki ele kale kadima ebu. ^{XX} Kitonekĩ betápuli bedza ne mbla a kī bisi a onukpẽ kī, “Nte oyae malo leta oto a ni, kene kī betale ye boe beko.” ^{XXI} Letsa a kī bemó a deĩ libe paa kī Mose malo le kī, “Libe wo yĩ, nkatila blibli!”

^{XXII} Leme mi kõ ni, Zion oto a sekẽ miya, Baguma kī edzi nkpã a omato kpale kī enye ode Yerusalem. Miya ne ye ode foto banyane mpim mpim a omato kame. ^{XXIII} Miyawo ne Baguma babi batonyade a kī betsele be buĩ ne ode kawole katsena a kame. Miya ne Baguma kī enye batidziwa flee foletsa odzene, mo bati wĩ a kī bekena be hũhũ bekpola a sekẽ. ^{XXIV} Miya ne Yesu kī enye apam voẽ a okplane sekẽ, mo ye baboane a kī besã a kī bedza bekpã bohe fotsa wĩ kaba Abel bade a.

^{XXV} Foesũ midã kadã wĩ kī mitásĩ oti a kī yale kodzela a foletsa katse. Kitonekĩ nte bikĩ bisĩ betátse oti a kī ele Baguma foletsa ne tite akū a tápuli bilo a ni, nde bóapuli bulo nte busĩ kī boátse oti a kī yale kodzela katomena ode a? ^{XXVI} Loko a na kame ni, ye odo kuna tite, leme finyaa kõ ele eyi kī, “Maakuna deedi bio, leme

nné tite odi, mbom mō ode lemε.” XXVII Fōletsa “deedi bio” a atsa pefee kī yaakuna fōtsa a kī εbōa a, εwōla foe, lemε fōtsa a kī εlāakuna a aakahō.

XXVIII Foesū mifō bonye kōle kī legākanyakō a kī kelāakuna a ta boe awe. Mifō bōkōa obu mō kavila busum Baguma ayekī fōawo ye anε, XXIX kitonekī boe Baguma a nye fi kī fōawōla fōtsa.

XIII

Ayekī Bōawo Baguma Anε.

I Mikaawe akū kale daa ndε Kristofō bawae aye. II Mite anε mikaate banōvōε ne mi awā. Badi kēna foe lōmō betε ode fōtō banyanε lemε binyīna. III Mite anε ne bikī bewaa kōla a akū ndε mimō be waa kōla. Mite anε ne bikī bamōna be lubo akū a ndε mimō be amō lubo.

IV Kεnε kī mi flee mido obu ne kōtsō mō kōnyō kadzi kame, ade kεnε kī batsō mō banyō bidi ōnōkōali bekpa akū a. Baguma aadzεmō bati a kī betεmō linyolewε mō litsolewε, mō bikī babōa adōpaa. V Minye sika anengbā ne mi kadzi kame, lōkōa fōtsa a kī mideī fuwo mi anε. Kitonekī Baguma lε kī,

“Nlāadzakū nfōne nō,

ade nlāafōne nō awe lemε a.”

VI Foesū mifō bōna ōwōle bōle kī,

“Boe Ōlate nye yī obumenanε, nlāavila.

Litsa otidziwa aapuli ekēna yī?”

VII Mite anε ne mi lōtō banyanε kōε a kī bide letsā ne Baguma fōletsa a akū bekpa mi a akū. Midā ayekī be kadzi kame na, lōkōa mitomō be

katekado. **VIII** Yesu Kristo moape a lena koke, edei nvia kii, yaana daa.

IX Mitafõ fotsa voẽ aholo aholo katsa lekpa mi miyela osi wi a. Fõnene ki miate owole kame kobẽ mitomena Baguma konyakamo kame odi, keba ki miakena ne funitsã kanya tebla akũ, kitoneki fotabumena biki bekena ne te akũ a.

X Budei afolibõ atenye ki Yudafo basofõ a ki basum ne patampa kame a lelã osi ki banya ye akũ afolibõ letsama.

XI Yudafo Osõfonokõ Flee a akõa bayae babõane kawomena ne Kaka Kpalawa Flee a kabõa bati tokpa akũ afolie, leme bapila bayae sekena a ne katsenakõ a obaẽ. **XII** Ade fukii sũ Yesu leme mó lubo eku ne omato a obaẽ, ayeki yaakõa ye moawe babõane ekpale bati akũ.

XIII Foesũ mifõ bone bonaa ye sekẽ ne omato a obaẽ, bonaate konyõã a ki bido ye a kudi.

XIV Kitoneki bolã omato odima ne tite kii akũ ki yaawa daa, mbom omato a ki yaaya a liti osi bolamena kawẽ.

XV Foesũ mifõ bõtsã Yesu akũ bokõa kamu ki kela nde afolie aye bokpa Baguma luwi nye luwi. Ade foe nye letsã a ki lane kato biki babõa ye di nde boe Olate ayea tunukpẽ a. **XVI** Mitalela fotsã wi kakena mo mi bawaẽ fotsã kakpa, kitoneki ade fukii nye afolie ki yawo Baguma ane a.

XVII Mibu mi lotõ banyane, midõla akũ mikpa be leme. Be adzole mi tekla akũ daa, nde bati ki baakena akunta bekpa Baguma ne be adzuma kakena a akũ. Foesũ nte mikpa be obu ni, baakena ye mo kawole, leme nte nné aye ni, baakena ye mo tuko kabe ki folãanya libi fokpa mi.

XVIII Mikaaboa mpae ne boe loló. Bote budo kī boe tɔwɔle kame kpale, kitonekī boawe kī boakena fɔtsa wī loko nye loko. XIX Miboa mpae kī Baguma efɔ mmuniki ŷya ne mi sekē moatse.

Mpaebɔ Ne Hebrifo Loló.

XX Baguma, lukudo okpane a kī edzela boe ɔlate Yesu kī enye Baveli Bakpāne ɔnokɔē a etomena kanokpa etsāmena apam baboane vɔē a kī elá kawūna kame a, XXI ekɔa letsa wī lidi nye lidi kī lisī mi ekpa mi, ayekī miakena ne ye kawɛ akū. Ade mawā kī etsā Yesu Kristo akū ekena letsa a kī yawɛ a ne boe kame. Kukūkpale kɔnya ye fude! Fɔya lomɔ.

Fɔletsa Nkaɛ.

XXII Nwaē ame, make mi aduli kī mina ɔwɔle boeε mitse kodɛ fɔletsa kī, kitonekī ovoli a kī ntsele mma mi a kame fɔletsa léla lugo.

XXIII Mawɛ kī makpa mi kanyi kī benye boe ɔwaē Timoteo ne kɔla. Nte ewo yī sekē moatse ni, bomɔ ye bóayasela mi.

XXIV Miwōna mi lotɔ banyane a mɔ Baguma bade a flee mikpa boe. Boe bawaē a kī bito Italia awōna mi.

XXV Baguma emɔ mi a flee kɔnya.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e